









結納期...

宋西制

高宗皇帝

近降亂軍

今聞逆虜

無首建奇功

取之翊朕平日恩顧之厚不可失此機會併遣使

表茲親筆卿宜知悉

鄂州府中



鄂州府印

宋高宗皇帝

以此款遺朕

力鼓率將士

併遣使

表茲親筆

卿宜知悉



鐵網珊瑚書品卷二

吳郡朱存理性父集錄於欣賞齋

宋西朝御札墨本

高宗皇帝

近降親筆責卿破賊以卿忘身徇國必能體朕此意
今聞逆虜親統賊衆衝突

卿首建奇功之時也卿其合軍戮力鼓率將士鏖戰
取之酬朕平日恩顧之厚不可失此機會併遺後患
故茲親筆卿宜知悉

御寶付沂中

押

連日聞叛賊已從霍丘謀度若有舟舡必亦不多一行軍兵老小想非一日可過料卿軍行之速必能及之若是淮水有淺處可以徒涉而過則王師可涉過淮追擊出其不意是一機會卿可稟張俊審度事勢併力前進是卿收大功之日也

御寶付沂中

押

付沂中

押封

朕昨在哀迷殆無生意勉從羣請姑視政幾觸事亡聊悲傷可述卿朕之腹心義均一體想惟痛憤同切于懷宜思奮揚雪吾大恥故茲親諭所宜悉之

付沂中

押

近據諸處探報及降虜面奏皆云兀朮與龍虎議定
欲誘致王師相近汴都併力一戰卿切須占穩自固
同為進止虜或時遣輕騎來相誘引但拙其鋒勿貪
小利墮其詭計俟有可乘之隙約定期日合力並舉
以保萬全廿七日

御寶 付沂中

押

覽卿奏已度江暫駐兵泗州比得韓世忠報提兵往
淮陽卿可審度事機應據若當事機即一面策應宜以體
國為念勿分彼此岳飛近奏留王貴等在蔡州已過

順昌由淮西前來奏事俟有定議即報卿知特遣親
札諒宜體悉

御寶付沂中

押

得岳飛奏措置班師劉錡奏復入順昌已令各且駐
軍近便去處報卿同共相度如機會可乘即約期並
進如未可亦可駐軍相近聲援相接勿致為賊所窺
卿可急遣人與飛錡議定卿一軍所向庶幾不失期
會也

御寶付沂中

押

張俊初二日發火頭初三日起發前去和州卿可星

夜蹉程前去會合不可時刻住滯有誤國事具知委
奏四日申時付沂中

押

得韓世忠初七日奏見駐軍淮陽城下并捉獲淮陽
告急天使稱已乞兵東京南京極力來援卿可與世
忠期約擇利策應毋失機會初遣卿行與岳飛合力
今飛方赴行在奏事世忠見已出師國事一也不得
輒分彼此遣此親札諒宜體悉

御寶付沂中

押

覽卿十一日奏前去徐州與韓世忠相為聲援兼欲

到徐親見世忠議事深見卿忠純體國徐在淮陽西
北虜人來援恐此犯卿切須明遠斥候常為大敵之
備仍與世忠勢力相接進退之間預相期約勿各自
為前却皆成孤軍已親札付世忠密告以專遣卿竭
力應援 令協和以濟國事再遣親札諒宜體悉

御寶付沂中

押

兀術復窺濠州朕已降手詔與韓世忠張俊皆於濠
州附近剋期同日出戰卿等各體此意不得前却卿
比之他人更宜為朕出力想不待朕言也曹勲想已
到軍前也卿家中平安朕 人照管報卿知十一

日

御寶付沂中

押

此報為兵節次渡淮已令光世張俊併兵破賊卿等
各宜竭力協濟事功副朕平日眷待之意策勳第賞
朕不敢吝故茲親筆卿可悉之

御寶付沂中

押

押

楊名文字二件付卿可子細看其間曲折令張去為
面說卿可熟思合如何處置却合奏來本欲召卿面
議恐彰其事所降文字却封來楊名已送大理寺實

禁聽候指揮

昨日行門來鎮射弓前後箭滿不破體殿侍時通却
喝前箭一指後箭三指並破體卿可理會自今後引
呈須管實喝如不實殿侍決配取逐人知委付殿司
收

押

和州賊遁走已降指揮令李顯忠追襲卿可速遣人
去說與顯忠可惜不勦戮縱令自去須是連夜前去
追趕

若收買堪好可修作戰船者百姓海舟亦可買二十

隻或三十隻

造船近人並和雇百姓不須役軍兵

可先次計料二十隻物料要在此處江內擺泊若先
要錢收買板木便來請

每船載甲軍五十人樺梢在外

只用可尅敵弓弩

可差人於平江府計會蔣璨如無錢候人回日別
來理會餘貼數錢御前貼請

右武大夫果州團練使殿前司後軍馬潘真於今
月初八日忽患啞中不省人事

此是風熱怯風丹卅粒只作兩服用生薑汁少許調成膏用水化下冰水大盞內并藥共半盞來服之看如何若省人事連來道切不可災

已令朱夏卿支銀三萬兩付卿等第支散隨李橫出戰傷中人并陣亡人家屬卿可躬親逐一支賜仍子細契勘所失亡人數并鎮江見在人數密具奏來

初九日

御實

付存中

卿以心膺之寄盡護諸將乃遽形懇避未悉至懷可專意措畫惟委付為務若有不率合者具名以聞復不可顏情容庇也除軍事外不得再有陳請

壽皇聖帝

朕屈已和戎欲休息軍民而虜情變詐不測侵軼朕以宗社之重敢憚應敵卿其明斥候審彼已無以小利為敵所誘宜堅壁養威斷其糧道使自困弊邊事稍閒當以樞密使處卿非但虛名正以羣臣知兵者少賴卿居中以佐朕聽決軍政卿益勉之以副朕倚注之眷遣此不多及

付楊存中

押

付楊存中

押封

朕以湯思退素不知兵又無人望今專以卿為都督

軍事一皆仗卿凡事更精審有立功人可除節鉞者
今有節度使已下牙牌并空名告宣續差人押付卿
凡有事宜頻具奏來

付楊存中

押

付楊存中

押封

卿總督師旅克壯戎昭折衝所臨虜欲潛遁雪寒增
凜忠蓋良勞今賜卿金合茶藥鞍馬至可領也

付楊存中

押

郭振在六合軍孤城小若遇虜人大軍必不能當卿
臨時相度今郭振退與王琪合兵控扼先須持重以

待敵人之困沿江戰艦可令早辦集王琪奏劄內謂
揚州無守禦之具如虜人侵犯亦無城壁可守以此
思之豈可須在堅城中坐也兩淮兵力可以抗強敵
否卿速具奏來王琪劄子宜付卿

付楊存中

今諸帥相和互為策應皆卿措畫之力劉琦宋受雖
在真州郭振在六合緩急須使會合禦敵不可止在
真州六合瓜洲真州二關緊急亦宜毀拆

付楊存中

押封

聞劉寶將軍馬已到寶應縣楚州失守此大係利害

不知此段事如何措置可速具奏來洪澤關已行毀
拆未清野事如何施行

付楊存中

押封

卿日近莫知敵情虛實否虜人漸深入又不聞虜中
別增兵今中外皆望卿進兵會合破敵朕未審卿機
會如何宜速奏來

付楊存中

押封

朕有親札與威方卿可一面付之緣前降指揮有所
未當

付楊存中

押

付楊存中

押封

真州所屯軍馬可併在揚州可惜分了兵勢宜速疾
施行真州閘恐當先次毀拆此一項卿更相度卿可
暫來鎮江措置朕亦令王琪合兵捍禦無失機會却
具奏來

付楊存中

押封

聞劉寶已徹洪澤閘甚為利便但運河能乾涸不復
通虜人戰船牌筏否設若相持日久連陰雨雪如何
使我軍將士暫回鎮江建康屋居火食以逸待勞卿
宜先作經畫此二事大係利害卿可速奏來

卿經畫甚當如虜人兵小未須迎敵恐賊精兵在後
以小兵誘我朕已令真州軍馬去併力捍禦

付楊存中

聞諸軍有向經宿州陣亡之家不加存恤或有迫逐
出寨殊非撫卹之意可且令在寨居住依舊按月支
給請受以俟贈典全在卿留意以副朕憫將士之懷
仍具奏來

付楊倓

押封

聞建康糧食極闕乏卿可速具奏來

付楊倓

押

付楊佺

押封

趙公稱已罷總領朕欲使卿兼之可否奏來

付劉源楊佺

押封

卿等所進兵帳甚整齊然有未盡處如馬軍正隊一百人餘合將僦人作不入隊隨正隊馬車數今冊上不入隊人恐是闕者當稱說闕馬人候有馬亦係正隊數如步軍正隊一百人不入隊止破三十人充輜重火頭可別簇隊伍裝成帳冊進來

據冊上不入隊人至有正使者豈有國家高官重爵養不入隊人若不堪戰何不揀去此尤當留意

付楊倓

押封

朕以荆襄一帶控制上游卿俟到官可與趙樽及襄陽統兵官帥臣等同議軍中事宜繕葺守備以濟國事仍須親往相視凡有利害條具奏來

付楊倓

御封寶

覽奏詳悉足見留心軍政深副朕意今撥降麻札刀一千口并所乞鐵甲可依數並差人於建康府黃彥節處支請木弩一千枝并弩箭依數並於郭剛處支請其見造鐵甲須令甲葉厚實諸州軍所造軍器亦

令堅壯堪好久遠可用更宜勉旃嗣有褒寵中前葉
衡造者軍器見於甚處安椿及如法否可具奏來

付楊倓

御寶封

已降指揮荆南民兵就帥府教閱專委卿提點器甲
務要足備訓練弓弩手尤須數多及較量斗力勿令
淺軟少用捨刀以充隊伍仍當遴選兵官緩急可用
以統率者以備不測委用想能深體此意益加勉旃

付楊倓

付楊倓

御寶封

已降指揮荆南府荆門軍襄陽府拘集民兵等各趕

赴瓜州敬閱日久理宜優卹可令楊倓黃茂材張子
顏先次犒設一次每人支錢兩貫文具的實合支錢
數一面報本路總領所日下取撥使用令本所却報
內藏庫撥還

付楊倓

付楊倓

卿遠拊方面軍民按堵深用歎嘉日今荆南一路民
兵多寡軍用器甲弓弩箭鏐的實數目一一開具奏
來

付楊倓

右高宗皇帝御札一十有九壽皇聖帝御札一十有
二賜臣先大父和王臣存中也壽皇聖帝御札有八
賜臣先父樞密臣倓也國家讎恥之痛自建炎及隆
興天子銳志未始一日不北向也義激於心志形於
辭所見者特其大畧也開大帥府之初大父遭逢簡
拔宏濟艱難期於剋復而后已嗣聖龍飛中興老臣
惟大父在焉總師旅壯戎昭狂虜遁讐又將以有為
也而大父凶矣先父繼被擢用晉位樞庭軍政重寄
亦備見於親灑之筆豈苟然哉伏讀而歎兩朝眷倚
之異未有如大父之隆而先父辱知於壽皇豈止焜

耀一時而已哉如徒積斃寶笥隱而不見俾聖謨神
筭弗克彰顯是臣蔽天地之大義沒父祖之至寵豈
所以侈大貺昭令績也用敢采求樂石編次刊上庶
幾貽之後代永：光明若夫翰墨飛螭燦然霞綺之
映漢炯然星辰之下垂願臣么微安敢迫視臣無任
欽戴皇懼而已

紹熙四年五月旦日朝奉郎直祕閣通判臨安軍
府兼管內勸農事賜緋魚袋臣楊文舉拜手稽首
恭書

君上眷顧之重臣子忠勤之篤可以動天地可以感

鬼神可以正綱紀昭烈烈萬世不能泯也伯高楊
徽君出示宋高宗付其祖楊和王父子御札及病風
熱賜祛風丹并切囑不可犯以艾火灸之帖於乎
分則君臣情逾父子骨肉後之忠臣孝子覽斯帖者
世雖古今亦感激重有啓於懷也其賣國背親之徒
見之寧不愧乎至正二十六年歲丙午三月十二日
顏思敬跋

太師武恭楊和王以忠勤淬勵之功扶翼宋室而高
宗壽皇二帝以眷遇之隆俾之贊畫軍務密見於書
翰往答繼而王之子倓出壽皇一知遇之即晉位樞

金魚升瑞卷二
庭亦以翰及如故則博平日之所竊聞者尚能旦
興起令獲與王之七世孫翰游茶觀賢父子親承二
帝書翰之跡真其情切而慈其詞謹而篤益信嚮之
所聞不為徒慕也吁雲龍風虎千載一時焉語曰君
使臣以禮臣事君以忠觀此豈不有夫且諸葛武侯
在漢受知於二主人皆以為絕無而僅有矧王父子
並用於朝沐其恩光寵眷則史籍之間昭：奕：能
不與諸葛異世而同符者歟洪武十五年歲壬戌八
月既望吳郡周博識

右宋思陵阜陵賜楊和王存中及其子樞密副使倓

御札總三十有九王之孫文暉粹次勒石於今二百
五年矣八世諸孫翦間以示予觀其議論之詳付託
之切誠要義激可謂至矣當其時徽欽北遷宋社幾
覆任武事者非有張韓劉岳及王諸公無以成建炎
隆興之業觀此固君人者有以得之乎然止於建炎
隆興而已不能使天下後世無遺憾者亦孰之所為
哉於戲六月之詩儼批孔熾我是用急南渡其甚矣
共武之服以定王國王父子同一不忝焉夫惟大雅
無念爾祖王子孫尚敬之哉洪武丙子夏六月上泮
廬陵楊士奇題

國家有難臣子奮不顧身而赴之乃職分之所當為
語云君使臣以禮臣事君以忠是也切惟南渡君臣
不能恢復中原為社稷計徒能倚辦一二大臣與賊
轉戰於數千里之外雖然理有定數事有未濟安得
而強為之今觀和王楊公暨賢嗣樞密公克勤王家
提兵敗賊於淮甸之境數蒙宸翰褒獎賜予亦已至
矣而公父子皆能盡瘁王事忠肝義膽感激於君上
者昭如日月垂耀於千古而不磨勒之琬琰傳之子
孫永々可觀七世孫翥能什襲珍藏凡見讀書君子
輒出示以顯揚先世之殊遇可謂繼志述事者也後

之為子孫者尚當寶之時洪武戊寅陽月晦會稽俞
鎔謹識

右宋高宗賜其將楊沂中御札十有八孝宗所賜十
有一帖及賜其子傑十帖歷二百餘年之久墨刻如
新豈易得哉沂中後賜名存中薨謚和王七世孫翥
字仲舉持以示余欲得一言贊其後夫存中之勲業
載在史策高孝之書翰稱于古今奚庸贊語嘗讀公
傳紹興十四年請詣太學謁先聖帝曰學校既興武
人亦知崇尚如漢羽林士皆通孝經况其它乎當播
遷之時方以攻戰為事而公之請及此人豈不以為

不急之務且非公所宜言殊不知學校之興迺天理存亡之機人心向背之源實在於此公之所識有異於庸瑣之將也能以功名終豈無所自哉孝宗嘗題其所藏御書之閣曰風雲慶會若公者足以當之矣計當時風雲慶會者匪一人而不能保厥君臣之始終則又有可深慨者烏閣今廢矣而御札則存也御札之存則賴子孫保護之也計當時受御札者亦匪一人今則不之見而特見之於楊氏抑又有可喜幸者烏仲舉好讀書居貧奉母確然有守而獨於此保護益謹傳曰公侯之子孫必復其始楊氏其將復始

乎歲己酉冬十有二月迎功郎楚府紀善樵李貝翺
書

世有通言恩篤父子義合君臣然恩可不勸而篤義
未有不孚而合者譬諸齊門之操瑟者焉其不至於
投棄亦幸矣古之人有抱負利器勇銳騶發芥視青
紫敏手拾之而卒至於顛頓風塵皓首弗遇意氣索
然喪其所恃者李廣難封廣嘗夜行見寢石以為伏
虎也射之一發而飲其羽就而捫之始悟為石載射
則矢躍而卻僅勝其膚迺撫而歎曰石乎我與匈奴
從事且廿餘年而所及皆膚寸之功吾誠知侯之不

終封而夙志蝕矣何怪乎吾力之不復勝此石也噫
功名之難不其然乎余觀趙宋高孝所賜楊和王及
王子樞密公手詔若干什而歎曰宋室南遷亂靡有
定王以軍功秉國之柄挾震主之威蒙不賞之功指
麾三軍以操天下之重輕凡在庭臣孰不危之而明
良相禮相忠義交孚論議措畫若出一人褒嘉之重有
稱比朕郭子儀者而論王之事業無愧辭焉歷宋而
明雖百世以遠即盈尺之遺墨尚可以想見二代之
餘風懿哉王父子得君之盛若是抑亦高孝之義有
以孚其心者耶傳曰忠臣之後世衍益昌王子孫宜

則之永樂庚寅夏六月初吉前正字四明顏懋敬書
宋高宗孝宗御札賜其大將和武恭王楊存中及其
子樞密倓者凡三十有九王之孫直秘閣文皞刻諸
樂石今三百年矣其八世孫翥出其墨本示余雲章
宸眷若前日事於以窺其君臣之際風雲慶會魚水
相資恩禮並隆有非偶然故宋不失舊物而王保厥
駿功福延後裔有由來矣洎讀王列傳觀其請詣太
學謁先聖及金人議和請拘其使能歸我族屬還我
舊壤損歲幣復白溝之界則和議可從不然請斬其
使亟圖恢復則其輔世經國之謀遠矣使其言聽而

宗澤岳飛之徒無死則宋之天步豈徒局但江介而已哉至其請命於朝俾厥祖宗閔厥考震死難之節大白於當世忠介忠毅之謚偕下顯忠報忠之廟而立錫其祭器許祭五世其祖母劉流落蜀隴禱祠訪問問閔數千里外卒迎歸致養其純孝之感又如此大倫克盡忠孝而有人紀賴焉翦字仲舉居約而有志績學以適道其忠敬行於家信義達於友卓乎楊氏之賢子孫也天爵之修人爵之來以復其初則有不期然而然者遂識諸末簡云永樂癸巳前浙江分憲安成周子治書

昔之有天下而以天下繫其心者雖衰亦不至於遽
亡為人臣能以忠義立大節雖亡其子孫必有振發
之者距淳熙十二年又九十禩宋亡和王八世孫翥
以行學為皇明翰林院檢討於乎信哉永樂丁未三
月初吉翰林五經博士廬山陳繼識

右宋高宗孝宗蠶書皆與和王楊存中父子者觀其
倚重圖全之意委曲至到而眷愛之情不啻如家人
父子令人感激思奮於易世之後况身親之者乎方
是時國步方艱大恥未雪易曰王臣蹇：匪躬之故
存中之謂歟其孫臨安通判文舉勒之於石以垂永

久八世孫翰林編修翦間以示予謹書此復宣德壬子孟冬初吉嘉議大夫太常卿兼翰林學士南郡楊溥識

宋御書

朕誕節再臨集英錫燕因成一詩

菲德承休帝命申青陽闔動御昌辰慶貽虹渚嘉祥
衍春滿鰲山景色新鎬燕頌思勤 靈韶協奏喜
橫陳在朝從此薰和氣要使驩心萬 均

賜鄭丞相

右宋御書律詩一首序曰朕誕節再臨集英錫燕其
後題曰賜鄭丞相識以二壘其一文曰庚戌集英杭
宋殿名庚戌則淳祐十年也然宋自南遷後凡三歷
庚戌此何以知之蓋建炎四年紹興元年皆無鄭丞
相有之者淳祐也按宋史鄭清之以端平乙未拜左
丞相丙申享明堂以灾異免淳祐甲辰為少保奉朝
請丁未復為右丞己酉轉左賜詩蓋在明年春又明
年封齊國公致仕越六日而卒此其證也或者不考
指為徽宗詩夫當時雖有鄭居中為省長然不名丞
相至孝宗朝始改尚書左右僕射同中書門下平章

事為左右丞相借使用古官稱之集英之署不古也
况詩有青陽闔動之語徽宗則以十月生旦在位二
十五年亦無庚戌歲此又易辨者若宋君多能書其
字畫識者自能鑒之又不暇論也故此詩知為理宗
錫清之無疑夫清之以舊學故致位宰輔既免倏起
眷遇益加翰墨之錫史家嘗載其顯德謨明閣扁至
於詩篇徽宗不勝紀錄此特流落人間者耳然片紙
揮洒官而不名即此足以見當時寵異之恩矣世之
覽者必將慨然於斯後二百三十七年為皇明成化
丁酉歲冬十二月己酉史官吳寬書

王氏宋勅并諸帖

勅賜進士及第王伯虎士平居時談仁義履忠信以
待舉也雖然不試之職不任之事亦無以觀其所効
焉今茲初命爾所以行已之時維是勉懋見於事業
尚有好爵為爾寵休可特授將仕郎守建州右司理
叅軍替張仲綰來年三月成資闕候見任官成資日
方得赴任

嘉祐四年六月日

中書令 闕

中書侍郎

闕

禮部郎中知制誥臣范鎮宣奉行

奉 勅如右牒到奉行

嘉祐四年六月日

侍中使

門下侍郎

闕

給事中使

翰林學士兼侍讀學士左司郎中知制誥判宿

六月九日都事李堯民受

左司郎中付吏部

左僕射闕

右僕射使

吏部尚書

闕

刑部郎中知制誥權判

時

吏部郎中充天章閣待制權同判

贄

吏部侍郎

在密院

吏部侍郎使

左丞使

告將仕郎試秘書校書郎守建州右司理叅軍王伯

虎奉

藏圖書品

勅如右符到奉行

主事 闕

太子中允充集賢校理權判 繪

令史劉瑛

書寫人解永安

嘉祐四年六月日下

右宋王公伯虎初登進士第授建州司理叅軍時
所受勅也按許文定公將誌公墓公為司理州有
疑獄久不決乃命徹械休於庭帷其廳而潛聽之
囚互相咎質其是非明日訊之衆相顧而驚以服
出其濫死者三數人然則可公謂能其官不負於

勅詞矣公字炳之閩之福清人仕至戶部郎中從
子伯起後家吳中是生著作先生信伯為河南程
氏高第弟子孫遂以儒業相承又十世為訥齋
隱君時勉且以醫名保其先世勅牒凡數軸手授
其子觀使謹藏之噫吳多故家求能保其故物而
不失者吾見王氏而已觀字惟顯方以名醫徵赴
京師以予交其父子間也盡携其所藏者示予以
歲月考之此軸最久蓋嘉祐四年至今幾六百年
矣成化丙午七月乙卯奉訓大夫右春坊右諭德
延陵吳寬書

勅王伯虎等樞密本兵其師有屬以檢衆職以詳度
務惟士之有材實者迺使君之爾等試職於此久而
可信宜進爾位且正厥名在朝在官勉其祗命可依
前件

熙寧六年五月日

中書令

闕

中書侍郎

闕

右正言充集賢校理直舍人院臣許將宣奉行
奉 勅如右牒到奉行

熙寧六年五月日

侍中使

門下侍郎 闕

給事中使

五月二十七日未時都事丁昭嗣受

左司郎中 付吏部

左僕射 闕

右僕射 闕

吏部尚書 闕

尚書祠部員外郎充集賢校理權判 下

尚書祠部員外郎充集賢校理同修起居注兼權同判 瑾

吏部侍郎使

吏部侍郎

闕

左丞

闕

告登仕郎守太子中允檢詳樞密院禮房戶房文字
刪定例策兼修經武要畧兼編修禮房國信條貫王
伯虎奉

勅如右符到奉行

主事

闕

權武昌軍節度推官克崇文院校書兼權判 安國

令史劉士謹

書令史杜章

熙寧六年五月日下

按墓誌公以吏部流內銓主簿改太子中允檢詳
樞密院禮房戶房文字一時建白教事議者以為
知國之大體而刪定例冊為件得八千七百有奇
又以泰山汾陰籍田朝陵行幸澶濮之類非常禮
據其行於時者為件得一千五百又以高麗入貢
修成宴勞式皆奏上之觀此則宋之繁文亦可考
見矣此勅按家乘所錄首缺勅王伯虎等樞密本
兵九字吳寬

勅登仕郎守太子中允檢詳樞密院禮房戶房文字
刪定例策兼編修禮房國信條貫兼權判太僕寺殿
中省王伯虎朕嘉爾勞序進厥官往率職事祇朕命
懋哉可特授守太常丞仍加都尉散官差遣如故

熙寧八年十月日

勅朝散郎監在京進奏院上輕車都尉賜緋魚袋王
伯虎為政之方未嘗不以振滯淹為事知夫材良難
得而善人弗忍也爾前以小疵去職累歲芥蒂疑似
衆以為惜今杖拭登序以收來効還讐書之舊秩加
中秘之新命益自敦勵毋負優渥可特依前朝散郎

行秘書省校書郎勳賜如故

元祐二年十一月四日

公以館閣校勘坐事謫監鉉山縣鹽酒稅勅詞所謂小疵去職者也哲宗初遷朝奉郎再遷秘書省校書郎獲被此勅其後缺數行其詞載家乘可考也吳寬

朝散郎行秘書省校書郎上輕車都尉賜緋魚袋王伯虎右可特授依前朝散郎權知饒州軍州兼管內勸農事替呂溫卿到任成資闕勳賜如故仍借紫候迴日却依舊服色

勅王伯虎等朕進退多士各盡名實不以微罪廢其
人不以非才玷厥官以爾伯虎頃緣曠蕩之澤再復
儒館以爾忠臣出自冗散之秩來儀省戶而治已不
肅人言屢至尚分專城之寄徃居別駕之任服我寬
厚無重悔尤可依前件

元祐二年十二月三十日

中書令

闕

尚書右僕射兼中書侍郎臣公著宣

中書侍郎臣呂大防奉

中書舍人臣孔文仲行

奉 勅如右牒到奉行

元祐三年正月一日

侍中 闕

尚書左丞權門下侍郎摯

給事中

臨

正月一日申時權都事蘓安靜受

權左司郎中彭次雲 付吏部

尚書令 闕

尚書左僕射 闕

尚書右僕射 公著

尚書左丞 摯

尚書右丞 存

吏部尚書 頌

吏部侍郎 覺

告朝散郎權知饒州軍州兼管內勸農事上輕車都尉賜緋魚袋王伯虎奉勅如右符到奉行

主事賈大年

考功郎中權 尹

令史魏宗式

書令史 闕

元祐三年正月二日下

按王氏家乘公凡五被制勅今真迹之存者四然
多缺而不完此則公出權饒州軍州所降者亦缺
其前數行幸當時三省官所署皆名在若呂申公
汲公孔舍人在中書劉忠肅公顧龍圖在門下王
右丞在尚書而吏部則蘓公子容孫公莘老元祐
人才信乎極一時之盛矣成化丙午八月上丁致
齋春坊朝房書寬

勅王蘋汝咸以儒學擢在道山比贊相臣纂修鉅典
凡筆削之去取兼載不遺核朱墨之異同咸得其當
按指事實錄之法彰辨是與非之明備一代之成書

金瓶玉露卷二
十六
詔萬世而垂憲首嘉事領之績可忘紬繹之勞恭覽
奏篇歎美無斁故茲獎諭想宜知悉

宋著作王先生在紹興初以布衣被薦得召見行
在當戎馬間陳說數百言正而不迂高宗重之且
有通儒之目遂除秘書省正字未幾兼史官校勘
會勅范冲重修神宗哲宗實錄以辨宣仁太后之
誣先生適預其事筆削有力書成此其獎諭之詞
也已而有著作佐郎之命一時因論昔誣誣之罪
追貶章惇蔡卞公論翕然始行然先生之學實出
於河南程氏以躬行實踐致君澤民為事初不在

於著述世主雖知所重而用之未當其任為可惜
爾先生為人見伊洛淵源錄讀者當自知之寬特
因其裔孫觀示此謹識其槩于後吳寬

胡文定公二帖

安國頓首頃在行闕奉所多教方欲再造問信已以
罪行矣既渡湘水之西山居自省相望數千里無緣
復通聲息懷思可量去此見報伏審賜對受知 寘
瀛館豈特交游之私慶也已辱書貺欣承校正多餘
德履增福未期晤集切冀順時為此道自衛不宣安
國頓首信伯學士執事

安國再啓一別三十年光既及而學未至回省初心
旦夕自愧每聞德譽想造養之益深也信伯既親見
伊川丈人入其堂與責任亦不輕矣使斯道遂行邪
說不得汨之也直有望於君勉之安國再啓

尹和靖十帖

焯頓首啓前月特蒙寵顧以病軀不得款奉教益為
恨繼辱賜書併錄示定夫所撰其叔父墓銘顯道書
先生易傳後捧領披讀感愧之心有不勝言專使至
承惠翰荷眷予不忘甚幸甚幸焯即此遠依麻底諸
事粗遣腰痛亦減七八不煩過慮曾憲來寓虎丘日

獲相見或云可居旬日車馬聞欲來此遂得款聽益
論未間尚冀為斯文自重懇：切：使還專奉啓起
居兼謝下情不周焯頓首再拜

錄示易傳差互且據焯所收本寫呈乞檢至更望訂
其是非他俟面議焯再拜

焯再拜啓向虎丘時蒙寵顧極荷眷予之勤去秋過
高隱辱館待至厚拜別之久日益瞻仰遠承惠問獲
聞動靜感慰兼集即日大暑伏惟尊體萬福焯去年
冬末來會稽凡事安集不敢有煩遠念末由拜會惟
乞為斯文倍加保重以副願望真切謹專附手啓上

上不周焯頓首再拜六月二十四日謹空

焯再啓自至會稽以退間不備講人事不遇便人故
久不得上問必能深察向承教論語二事今已改正
或更有未定處有的便無惜貶諭朋友切磨之道廢
而不講正頴吾信伯也萬：留念顥望顥望貴眷各
叶吉慶時暑以保愛為祝小姪與已受恩今年三月
得岳祠亦薄有祿廩僥倖亦恐知之焯再拜
焯頓首啓拜違教益而見改歲瞻仰之心與日增積
仲夏謹時伏惟贊畫之暇尊體萬福焯守拙碌：隨
分而已然則平日所聞不敢不尊衰老日甚幸未昏

憤不煩過念未由拜會敢冀順時保重前需召除以
副友執之願謹專附狀起居不周焯頓首再拜信伯
通守學士賢友執事五月十六日謹空

焯再啓近函收所惠教墨獲聞動靜感慰兼至過荷
不忘甚幸甚幸常州往來衝要應接不能不少勞神
用在信伯處之必不廢力有暇進道否有學者來講
此道否必不倦以告也塊處僻寺向風不勝馳情焯
再拜貴眷各惟上下安裕夏暑敢以保愛為請焯上
問賤累特蒙問念感愧之至焯再拜

焯頓首拜啓久違益論日增瞻仰專使至特辱貶教

伏審即日按察之暇尊體萬福感慰兼集焯居此幸
安諸事粗遣不敢煩念慮未有拜會之期向風馳情
秋暑尚炎伏乞順時保重前需大來以副願望下情
豈勝拳：使還謹奉狀起居兼謝不周焯頓首再拜
信伯通守學友士舊執事八月上澣日謹空

焯再拜啓邢婚以日到府中不敢草率上狀小姪墀
近已娶婦只此中人家老拙又且了此一事伏恐知
之皆辱流問荷眷與復拜起居禮焯再拜上

時主簿紫芝到任未久不通問陳齊之今赴官未嘗
通訊否或訪我存亡盡為告之焯又拜



上海圖書館藏
[Faint, illegible text]

世醫師曰秋學之
 安若事無遺不及
 秋將而矣伏乞
 豈勝幸甚伏乞
 信信通于
 燁再拜感
 適已娶婦只
 之皆原流
 時主簿
 通訊書或訪我



秋將而矣伏乞
 豈勝幸甚伏乞
 信信通于
 燁再拜感
 適已娶婦只
 之皆原流
 時主簿
 通訊書或訪我



浙江圖書館善本

甲登記號：030432

一九 年 月 日



陸年 陸月 念 陸日





Blue Cyan Green Yellow Red Magenta White 3/Color Black

TIFFEN Color Control Patches

© The Tiffen Company, 2007

Centimetres

1 2 3 4 5 6 7 8 9 10 11 12 13 14 15 16 17 18 19
Inches





inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color Black